

25.5.2017.

Izvor: Akta.ba, 24.5.2017 15:19:03



Šta bi se desilo da privrednici bojkotuju plaćanje PDV-a samo dva mjeseca, pitaju se bh. privrednici koji već dva mjeseca čekaju da se Vijeće ministara, Uprava za indirektno oporezivanje i Upravni odbor UIO izjasne o inicijativi za izmjene Zakona o PDV-u.

Nas ne zanima ko je pozicija, a ko opozicija u ovoj zemlji. Nas zanima ambijent u kojem privrednici neće zatvarati firme i dizati kredite da bi platili PDV – poručili su danas privrednici na okruglom stolu o inicijativi bh. privrednika za plaćanje PDV-a po naplaćenim računima, koji je Institut za razvoj mladih KULT danas organizovao u Sarajevu.

Institut je inicijativu kojom se traže izmjene Zakona koje se odnose na uvođenje sistema plaćanja PDV-a od privrednika državi tek kada on naplati fakturu koju je izdao svom kupcu, a ne samo po izdavanju te fakture pokrenuo u martu 2016. godine, a podržalo je više od 30.000 privrednika u BiH okupljenih oko privrednih i obrtničkih komora, udruženja privrednika i udruženja koja u fokusu svog rada imaju pomoć privredi, kao i pojedinačni privrednici.

U martu ove godine, inicijativu je u formi poslaničkog pitanja prema Vijeću ministara, Upravi za indirektno oporezivanje i Upravnom odboru Uprave za indirektno oporezivanje, uputio poslanik Saša Magazinović. Reakcije nadležnih na poslaničko pitanje još uvijek se čekaju.

Privrednici kreditiraju državu bolje od MMF-a i bilo kojeg kreditora i to beskamatno. Reakcije onih koji odlučuju o opstanku privrede i privrednika ne smiju se ovoliko dugo čekati! – poručio je Saša Magazinović, poslanik u Predstavničkom domu PSBiH



Ovom inicijativom želi se pomoći malim privrednicima, a ne velikim korporacijama i preduzećima koji su među najvećim dužnicima po osnovu plaćanja PDV-a državi.

"Okruglom stolu prisustvovali su svi osim onih koji su danas ovdje trebali biti. Vijeće ministara, Uprava za indirektno oporezivanje i Upravni odbor UIO šute dok njihovo izjašnjavanje o izmjenama Zakona o PDV-u čeka 30.000 privrednika koji podržavaju inicijativu. Pozivamo ih da se izjasne i pomognu bh. privrednicima", istakao je Jasmin Bešić, izvršni direktor Instituta za razvoj mladih KULT.

Inicijativa ne predlaže eksperimentalna rješenja, već sistem obračuna PDV-a po naplaćenim računima, koji je u primjeni u 22 zemlje članice EU, a primjenjuju ga i susjedne zemlje Srbija i Hrvatska. Izmjene Zakona odnosile bi se na privrednike koji godišnje ostvaruju promet do milion KM.

Zbog trenutnog Zakona mali privrednici primorani su kreditno se zaduživati da bi platili PDV, a upravo su zbog ovakvog zakona i brojnih nameta koji opterećuju njihovo poslovanje primorani gasiti preduzeća i poslove.

Prema riječima prof. dr. Vjekoslava Domljana, Bosna i Hercegovina ima najkonzervativniji i najrigidniji Zakon o PDV-u koji se mora mijenjati.

Kako je tokom rasprave zaključeno, riječ je o inicijativi koja zaslužuje pažnju donosioca odluka,

a privrednici, predstavnici nevladinih organizacija i svi savjesni građani bh. društva u narednom periodu moraju se još intenzivnije zalagati za njeno usvajanje.

Podršku inicijativi za izmjene Zakona o PDV-u tokom rasprave su iskazali i poslanici DF-a i stranke A SDA.

Okruglom stolu prisustvovali su poslanici i delegati Parlamentarne skupštine BiH, predstavnici udruženja privrednika i poslodavaca, privrednih i obrtničkih komora iz FBiH, RS i BD, dok se pozivu nisu odazvali predstavnici Vijeća ministara, Upravnog odbora Uprave za indirektno oporezivanje i Uprave za indirektno oporezivanje.

Institut za razvoj mladih KULT okrugli sto organizovao je u okviru inicijative „Poslovni prostor BH“ koja se provodi u okviru Projekta održivosti civilnog društva u Bosni i Hercegovini (CSSP), koji realizuju Centri civilnih inicijativa (CCI) i Centar za promociju civilnog društva (CPCD), a koji je podržan od Američke agencije za međunarodni razvoj (USAID).

